

INUIT ATAQATIGIIT

Inatsisartuni



UKA 2020/67
18. november 2020
Múte Bourup Egede

Qilalukkat nipinut illersorneqarnissaat siunertaralugu kangerlunni qaqortat qernertallu sivilunerusumik najortagaanni angallatit aalajangersimasut ingerlaartarnerisa killilerneqarsinnaaneranut periarfissat misissoqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UKA2021-mut naammassineqarsimassaaq iliuusissanillu aalajangersimasunik siunnersuutitaqassalluni.

(Inatsisartunut ilaasortaq Jens NapãtôK' Partii Naleraq)

Inuit Ataqatigiit nunatsinni avatangiisitta minguitsuunissaanik paarilluarnissaanillu pingaartitsilluinnartuuvugut.

Nunami manna tummisarput, siulitta eriagalugu paarilluarsimallugulu uagutsinnut kingornutassiaaraat. Uagullu ullumikkut annertuumik pisussaaffeqarpugut, siulitsinnit kingornussimasatta kinguaatsinnut paarilluarsimallugu kingornutassiarinissaanut. Avatangiiserpummi paarilluarutsigu inuusaaserput kulturerpullu aamma illersussagatsigit.

Inatsisartunut ilaasortaq Jens NapãtôK' maanna siunnersuuteqarnermigut nunatsinni avatangiisitsinnik, pingaartumillu siunnersuummi pineqarpiartut tassalu uumasut nunatsinni najortagaannik illersuinissamik qaqitsivoq pingaaruteqartumik. Siunnersuummi siunnersuuteqartup qilalukkat qaqortat qernertallu illersorneqarnissaat siunertaraa. Siunertallu taassuma uumasooqatigiinnut allanut aamma atuussinnaanera Inuit Ataqatigiit soqutigaarput qulaajaaqataaffigissallugu.

Issittumi inuuvugut avatangiiseqarluta, uumassusiliuppata uumaatsuuppataluunniit sunnernerlunneqapallassinnaasunik. Silap pissusaata allanngoriartorneratigit sunnerneqaqqavugut, tamannalu ilutigalugu piffiit qangaaniilli tikinneqakulanngitsut, siulittalu kisipajaamik pinngortitarsuarmik inuuniuteqarlutik isumalluuteqarnermikkut tikittarsimasaat inuiassuarnit allanit tikinneqartalerput.

Immitsinnut inuusaaserpullu illersorniarlugit minnerunngitsumillu avatangiisitta, uumasut nunallu illersornissaat qulakkeerniartuagassaraarput.

Aap, ineriartornermut tulluussartarpugut tamannali isumaqassanngilaq naleqartitatsinnik kinguaassatsinnullu kingornussiassatsinnik akiginnilluta pitissagipput.

Avataaneersummi nunami maani ineriartorneq aqussanngilaat, uagununa aqutassarput.

Inuit Ataqatigiit tamanna naqissuserumavarput, ullumikkummi avataaneersut pisuussutitsinnik iluanaarniarlutik sunniinarnerat uteriinnerallu tappingerfigissanngilarput. Nunami tummisarput kinguaassatsinnit attartugariinnaratsigu. Paarisariaqarparput aamma ineriartorneq sapanginnagu nammineq aquttuassavarput.

INUIT ATAQATIGIIT

Inatsisartuni



Siunnersuut soqutiginarloq uumasooqatigiinnullu allanut aamma atuutsinneqarsinnaaneraniq qulaajaaffigissallugu misissugassaqqittoq taperserlugu ataatsimiitsitaliamut susassaqartumut ingerlateqqipparput.